

## 每週經課朗誦經文(巴克禮漢羅/教羅)2013/02/03

### 共同經課 - 1

#### 耶利米書一章四節~十節

4 耶和華 ê 話臨到我，講，5 我未創造你 tī 腹肚內 ê 事先，我 bat 你；你未出胎 ê 事先，我分別你做聖；設立你做列國 ê 先知。6 我就講，害 ah！主耶和華 ah，你看，我 boē 曉講，因為我是 gín-ná。7 總是耶和華對我講，你 m̄-thang 講，我是 gín-ná；因為我見有差你，你 tiòh 去；我見有吩咐你，你 tiòh 講。8 你莫得驚 in，因為我 kap 你 tī-teh，beh 救你；這是耶和華講 ê。9 耶和華就伸祂 ê 手摸我 ê 嘴。耶和華 kā 我講，你看，我有將我 ê 話，hē tī 你 ê 嘴。10 看 ah，今 á 日我設立你 tī 列邦列國 ê 頂面；是為 tiòh beh 拔出，beh 拆毀，beh 敗壞，beh chhia 倒，beh 建立，beh 栽培。

### 共同經課 - 2

#### 詩篇七十一篇一節~六節

1 耶和華 ah，我 oá 靠你，求你 hō 我永永無見笑。2 照你 ê 公義拯救我，hō 我脫離；À<sup>n</sup> 耳孔聽我，來救我。3 求你做我 thang khiā 起 ê 石磬，hō 我常常去 tiàm hia；你已經命令 beh 救我。因為你是我 ê 山巖，我 ê 山寨。4 我 ê 上帝 ah，求你救我脫離 phái<sup>n</sup> 人 ê 手，脫離不義 kap 殘忍 ê 人 ê 手頭。5 因為主耶和華，你是我所 òng 望-ê；Tùi 我少年 ê 時你是我所 oá 靠 ê。6 我 tùi 胎裡 hō 你扶持，hō 我出老母 ê 腹肚 ê，是你；我 beh 常常 o-ló 你。

### 共同經課 - 3

#### 哥林多前書十三章一節~十三節

1 我設使能講人 kap 天使 ê 音語，若無仁愛，我就成做響 ê 銅器，tàn ê là 鈸。2 我設使做先知，明白 lóng 總 ê 奧妙 kap lóng 總 ê 知識；koh 設使有齊備 ê 信，夠額來移山，若無仁愛，我就 boē 算做是甚麼。3 我設使盡所有 ê 來賑濟，koh 獻我 ê 身軀 hō 火燒，若無仁愛，就我無得 tiòh 利益。4 仁愛是 gâu 寬容慈悲；仁愛是無怨妒；仁愛無誇口，無 phín-phóng，5 無行見笑 ê 事，無求家己 ê 利益，無快受氣，無記得人 ê phái<sup>n</sup>；6 無歡喜不義，是 kap 真理 sa<sup>n</sup>-kap 歡喜；7 凡事忍受，凡事相信，凡事 òng 望，凡事吞忍。8 仁愛永遠 boē 無一去；但是先知 ê 職 beh 廢無，hiah-ê 音語 beh soah，知識 beh 廢無。9 因為咱所知 ê 無完全，做先知也無完全；10 完全 ê 若到，無完全 ê 就廢無。11 我做 gín-ná ê 時，講話親像 gín-ná，性情親像 gín-ná，意見親像 gín-ná；已經成人，就廢無 gín-ná ê 事。12 因為咱 ta<sup>n</sup> 對鏡 teh 看，bū-bū 無明；但是到 hit 時就當頭對面。我 ta<sup>n</sup> 所知無完全；到 hit 時就知，親像我 hō 主知一樣。13 現今所存 ê，就是信、òng 望、仁愛；chit 三項，其中第一大 ê 是仁愛。

### 共同經課 - 4

#### 路加福音四章二十一節~三十節

21 伊就開嘴對 in 講，Chit-ê 聖經 ê 應驗，lín 今 á 日有聽見 lah。22 眾人 lóng 干證伊，奇怪伊 ê 嘴所出恩典 ê 話；就講，Chit-ê Kiám m̄ 是約瑟 ê Kiá<sup>n</sup> mah？23 伊就對 in 講，Lín 的確引 chit-ê 俗語，tùi 我講，醫生 ah，你 tiòh 家己醫；見若阮聽見你行 tī 迦百農 ê，也 tiòh 行 tī chia，就是你 ê 本所在。24 Koh 講，我實在 kā lín 講，Bē 有先知 tī 本所在 hō 人接納伊 25 但是我真實 kā lín 講，當以利亞 ê 時，天炕旱三年半，遍地大飢荒，hit 時以色列中有 choē-choē 守寡人，26 以利亞 bē bat 奉差去 chhē in 一人；只有去 Se-tùn ê Sat-lèk-tāi，chhē 一個守寡人。27 Koh 先知 Í-lī-sa ê 時，以色列中有 choē-choē tháí-ko ê；其中無一人得 tiòh 清氣，只有敘利亞人 Nái-bān nā-tiā<sup>n</sup>。28 Tī 會堂 ê 人聽見 chiah-ê 話，lóng 滿心受氣；29 就起來趕伊出城外，in ê 城起 tī 山頂，眾人帶伊到山坎，beh kā 伊 chhia 落去。30 若是耶穌對 in 中間行過，做伊去。